

Date – 05/05/2026

Time - 7:30 -7:40 Hrs  
AKASHVANI AIZAWL

## REGIONAL NEWS BULLETIN

### HEADLINES (MORNING)

1. Union Textile Minister PU Giriraj Singh chuan kum 2035 ah Mizoram chuan Silk Metric ton 1000 aia tam an dehchhuah theih a beisei tih a sawi.
2. Chief Minister Pu Lalduhoma'n Niti Ayog Member kal chhuak tur Dr VK Paul nen an inkawmna ah Mizoram hmingthatna hrang hrang tarlangin state ralmuang ber annih baakh tunhnaiah Silai keng pawl awm chhunte remna an siampui thu a sawi.
3. Akashvani Aizawl chuan kumina kum 90 a tlin pualin vawiin hian Musical Concert a huaihawt dawn.
4. Prime Minister Narendra Modi chuan nimina state hrang hranga vote chhiar chu mipuite duhthlan sawrkar pianna hun pawimawh ani a ti.

<><><>

### UNION TEXTILE MINISTER

Union Textile Minister Pu Giriraj Singh chuan kum 2035 ah Mizoram chuan Silk Metric ton 1000 aia tam an dehchhuah theih a beisei tih a sawi.

Zan khat riaka Mizoram tlawha lo zin Union Textiles Minister Pu Giriraj Singh chuan a cham chhungin Sericulture Department hmun pawimawh hrang hrang bakah Commerce & Industries hmun pawimawh hrang hrang tlawhin Silk vang leh tha bika an sawi - Muga silk chu Mizorama a tam thu sawiin, Mizoram chu 'Golden State' tih hiala koh a duh tih a sawi a. Kum 2035 ah chuan silk metric ton 1000 aia tam an dehchhuah theih ngei a beisei thu leh Central sawrkar chuan kuthnathawktute hmasawn zelna atan sum pek chhuah an ui loh thu a sawi.

Union Textiles Minister chuan hmeichhiate chawikan pawimawhzia sawiin Lakhpati Didi scheme chu tangkai zawka hmang turin puantahtu nuho a chah a; he scheme hnuaiah hian tun dinhmunah cheng nuai 5 thleng pek theih niin, nuai 10 thlenga dawn theih tura siam an tum thu a sawi baw.

Union Textiles Minister chuan Mizoram khaw awm dan leh lei chu sericulture tan a tha em em tih sawiin, Silk a eizawmna in hma a sawn zual theih nan, Mizoram chu cluster ah inthen se a duh thu a sawi baw.

<><><>

### LPG RATE

Indian Oil Corporation Limited-in Retail Selling Price thar a tihchhuah angin Mizorama eirawngbawlina gas man bithliah thar a ni.

Ruahman ang chuan Domestic bur khat Kg. 14.2 chu Vairengteah Rs. 1,056 a ni a, Mizoram hmun dangah chuan Rs.1,065 a ni thung a. Sumdawnna atana hman chi LPG Commercial bur khat Kg. 19 chu Vairengteah Rs. 3,530 a ni a, Mizoram

hmun dangah Rs. 3,544.50 a ni a. Xtra Tej Kg. 19 chu Vairengteah Rs. 3552.50 a ni a, Mizoram hmun dangah Rs. 3567 a ni a, Kg. 10-a rit Composite bur khat chu Vairengteah Rs. 756.50 niin, Mizoram hmun dangah Rs. 766 a ni thung.

Eirawngbawlna Gas man thar hi tun thla ni 1 atang khan hman tan a ni a, Domestic man hi AMC leh District Hqrs-ahte home delivery kalpui nih avangin bur khatah Rs. 70 belh zel tur a ni a, Godown-a hralh a nih chuan Rs.33.43 zel paih tur a ni thung a. Home Delivery a kalpui thei lo veng, point delivery kalpuinaah chuan Rs.7.53 belh tur a ni a. LPG Home delivery-a semah hian kg. 10 cylinder sem tel a nih chuan bur khatah Rs. 70 zel belh tur a ni a,Kg. 5 cylinder sem tel a nih chuan Rs. 20 belh tur a ni.

<><><>

## CHIEF MINISTER

New Delhi-a châm mek Chief Minister Pu Lalduhoma'n nimin khan Niti Ayog Member kal chhuak tur Dr VK Paul chu Mizoram House, Chanakyapuri, New Delhi-ah a kawm a, Mizoram hmasawna tur kawng hrang hrang an sawi dun.

Dr. VK Paul chuan a hun chhunga Mizoram sorkar nen tha taka an thawh dun avangin lawmthu a sawi a, Chief Minister Pu Lalduhoma hmalakna hrang hrang fakin Niti Aayog nen thawhona tha tak an nei thei chu lawmawm a tih thu a hrih a. Mizoram chu state ralmuang tak a nih thu state dangten an hriatpui thu a tarlang.

Chief Minister pawhin Niti Aayog-in Mizoram a duhsaknaah lawmthu sawiin sawhthing chungchanga hmalakna an neihte chu Mizoram in a chhawr mek thu a sawi a, Mizoram chu ziaak leh chhiar thiam vekna state hmasa ber a nih thu te, eirukna leh hlemhletna laka state fihlim ber a nih thu te, khualzin hip kawnga hmasawn nasa tak a nih thute leh India rama state ralmuang ber a nih mek thu sawiin tunhnaiah silai keng pawl awm chhunte remna an siampui tih a sawi bawk.

Inkawmnaah hian Tourism Minister Pu Lalnghinglova Hmar pawh telin Niti Aayog leh Mizoram sorkarin Tourism Conclave an buatsaih dun tur chungchanga hmalaknate an thlir a. May thla chawhnu lamah Delhi-ah pre-conclave meeting neih an rel bakah Tourism Conclave-a Niti Aayog hmalaknate official lamin an hrihfiah a ni.

<><><>

## GINGER

Kum hnih chhunga Mizorama thar sawhthing man san ber lai a thleng mek a, nimin khan Mualkawi Secondary Collection Centre-ah sumdawngten sawhthing kg. 1 cheng 59 leh duli -a lei turin auction an chhang a, SCC dangah pawh cheng 50 chunglama auction chhanna engemaw zat a awm.

Nimin vek khan sorkarin rapchung technology leh tapchhak technology hmingpua sawhthing tih rona khawl society-te hnena pek chhuah tura a siam chu enhhina trial run neih a ni.

Sorkarin SCC kaltinga kuthnathawktute sawhthing hralh hun tura a bituk chu tun thla ni 30 thleng a ni a; Akashvani News, Aizawl zawhna chhangin Mizoram Agriculture Marketing Board (MAMB) hotute chuan, nimin khan SCC hrang hrangah sawhthing auction niin, a chhang sang berin Mualkawi SCC-ah kg 1 cheng 59 leh duli-in an chhang a; hriat theih chinah East Lungdar SCC, Rabung SCC,

Khawzawl SCC, Hrangchalkawn SCC leh Lungtan SCC-ahte pawh kg 1 cheng 51-55 inkara lei turin sumdawngten auction an chhang a ni.

Kan corr report lo ngaithla ang.

*Nikum khan sawhthing hi a rate a san lai berin cheng 30 a nih thu MAMB hotute chuan an sawi a; kuminah sawhthing hralh a nih tan tirh khan cheng 40-45 inkar ni turin sorkarin bituk mah se, lei ngam an awm lo a, tun dinhmuna erawh chuan kg khat cheng 50 aia sanga lei nngam sumdawng engemaw zat an awm a, kum 2 chhunga sawhthing man a san ber lai a thleng mek tih an sawi.*

*MAMB hotute chuan sorkarin rapchung tehcnology leh tapchhak technology hmanga sawhthing zailep tihrona khawl a siamtir chu vawiin khan Sairanga Sawhthing sawngbawlina hmunah enchinna (trial run) neih a nih thu an sawi a; khawl hi 60-70 vel lei a ni dawn a, society-te hnenah tlâwm têin sorkarin a pe ang, an ti a; sawngbawlina khawlte a taka hman tura peihfel a nih chuan loh theih loha hralh tura sumdawngte hnena thlai thar nawr liam ngai thin chu a bo theih tawh an beisei thu an sawi.*



## AKASHVANI 90 YEARS

Akashvani Aizawl chuan kumina kum 90 a tlin pualin vawiin hian Musical Concert a huaihawt dawn.

Akashvani Aizawl hian kum 90 tlin lawmna pual hian lawmna hrang hrang a buatsaih chho mek a, April ni 30 khan All India Radio in kum 90 a tlin lawmna pualin Lamp Lighting Ceremony an buatsaih a, hetah hian Akashvani Aizawl Director leh Mizoram Cluster Head Pu DR Lalropuia chuan All India Radio kum 90-na puala chhit det hawngin All India Radio din chhoh dan leh pawimawhna hrang hrang a sawi a, zai leh lam nen hun hlimawm tak buatsaih a ni.

All India Radio kum 90 tlin lawmna pual hian vawiinah Musical Concert chu Central YMA hall, Tuikhuahtlang hall ah buatsaih a ni dawn a, he hun hi I&PR Minister Pu B. Lalchhanzova'n a hmanpui dawn a ni.

Akashvani kum 90 tlin rual hian Akashvani Aizawl pawhin kum 60 a tling a, heng ni pawimawhah hian programme hrang hrang buatsaih tum a ni.



## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.



## MUHCS

Mizoram State Healthcare Society Chief Executive Officer Dr Lalhriatzuali Ralte chuan hriattirna tichhuakin, Mizoram Universal Healthcare Scheme

empanelled hospital ni loah damlo admit theih a nih thu leh damlo admit turte chu nunna chhan nana enkawl nghal ngai -emergency bik chauh a nih thu a tarlang.

Dr Lalhriatzuali Ralte chuan, kumin April ni 1 atanga kalpui tan MUHCS 2.0-ah empanelled hospital ni lo te'n MUHCS hmanthu damlo an enkawl theihthe chu - ICU-a dah nghal ngai damlo-te, nunna chhan nana zai nghal ngai leh accident tâwk nunna chhan nghal ngai te an nih thu a tarlang a ni.

*Healthcare society-in an tarlan danin tun dinhmunah Mizoramah empanelled private hospital 16 a awm mek a; chu'ngte chu Aizawl district-ah JC Eye Hospital, Chaltnang leh Ramhlun North-a Nazareth Hospital, Redeem Hospital, Synod Hospital, BN Hospital & Research Centre leh Eye Care Hospital-te an ni. Champhai district-ah DM Hospital leh MED-AIM Hospital te, Lawngtlai district-ah Christian Hospital leh Lairam Christian Medical Centre te, Lunglei district-ah Christian Hospital, Faith Hospital leh John Williams Hospital te, Serchhip district-ah Mercy Hospital leh Siaha district-ah Maraland Gospel Centenary Hospital-te an ni.))*

*Puan tawh angin MUHCS 2.0-ah hian MUHCS kalpuitu damdawi-inte hnenah damlo in enkawl na senso rullh nan kum 2026-27 atan sorkar kum intan thla, April thla khan sorkarin cheng nuai 700 vel a pechhuak a, hei hi damlo 2,615 enkawl na senso a ni. MUHCS 2.0-ah hian pawisa senga inziaklut chhungkua 37,851 awm tawhin, nikuma inziaklut chhungkua 20,213 aiin kumina inziaklut tawh zat hi chhungkaw 17,638-in an tam tawh a; inziahluh theih hun hi tun thla ni 15 thleng hawn niin, online hmangin muhcs.mizoram.gov.in ah inziahluh theih a ni. Sorkar hnathawkte, pensioner-te leh golden card neite chu inziahluh a ngai ve lo.*

<><><>

## UNION MOS FOR COAL & MINES

Union Minister of State for Coal and Mines, Satish Chandra Dubey chuan Saitual district-a hmasawna leh sorkar inrelbawl na kalpui mek enfiahin nimin khan Saitual District a tlawh.

Ni hnih cham tura lo zin Union Minister of State for Coal and Mines hian nimin khan Lengpui alo thlen hnuah Saitual a pan nghal a, hetah hian Saitual Deputy Commissioner, Srinivas Sadi leh District hotu dangten lo dawngsawngin thil pawimawh hrang hrang sawiin an thukhawm a, tualchhung inrelbawl dan leh hmasawna hnathawh hrang hrang kalpui mek te dinhmun thlirho a ni.

Union Minister of State for Coal and Mines Satish Chandra Dubey hian vawiinah district chhunga hmasawna hnathawh hrang hrangte chu a hmunah a enfiah dawn a ni.

<><><>

## PM MODI

Prime Minister Narendra Modi chuan nimina state hrang hranga vote chhiar chu mipuite duhthlan sawrkar pianna hun pawimawh ani a ti.

Prime Minister Narendra Modi hian nimina state hrang hrang West Bengal, Assam, Puducherry, Tamil Nadu leh Keralam a vote chhiarah an party hlawhtlinna kawnga hnathawktute hnenah lawmthu sawiin inthlan result chuan Democracy

ropuina a lantir a ti a, Vote thlaktu mipui zawng zawng hnenah lawmthu sawiin  
inthlan tuang taka neih ani chu lawmawm atih thu a sawi.

<><><>